



त्योल

अर्जन देव मजबूर



Source: 'tyól' by Arjun Dev Majboor. Year of publication: 1995

Rewritten in Devanagari-Kashmiri by M.K.Raina

Work completed on 21.02.2005 ~ Updated 21.03.2020

शलेंदर, नील नाग
तु कुलि आलमुक्यन गुलन हुंदि नावु

त्योल

मे बोलुम सीर ब्यतप्रकिस राजु होंजस
पनुन्य रथ यादु वेंत्रुक्य सुत्य दितिमस
मुकामा अख जुवा तस याद पॉविथ
खसुन आकाश वोलुमस तेज वुफ दिथ
स्यठाह पोरुमस तु कौरुमस ज़ारु पारय
वुनल आसी तु पॅक्यजे वार वारय
करुन्य नो छय न कुनिची द्यारु कारय
सु आलम म्योन अज वुछिज्यन दुबारय

सुली शोकस ओनुम व्यस्तार द्युतुमस
विहल सोचस तिहल रफतार द्युतुमस
पॅतिम वाकाथ तौरिथ मालि माले
मे वोलुमस तार लॅग्यनय बालु ताले
जमानुक्य बॉव्यमस हालाथ सॉरी
दिलुक्य मुन्नरिथ मे थॅव्यमस सॉर्य तॉरी
व्यचारन हँद्य सन्यर छौरिथ बराबर
मे वोलुमस छांडतख अज गाशि आगर

ओबुर आसी कोहन वथ वुछिजि वारय
करामाथा च्रु हावुम छुय नु चारय
खँसिथ बालन नयन येलि छालु मारख
च्रु विगने काँसि पथ यिनु व्वंदु हारख
बुनपशी पोशि रादन व्यूर तुलिजे
वनन हुंद नूर अंदरिमि कायि मॅल्यजे
तु लोलय सुत्य सोचुक बोस बॅर्यजे
छँतिस शीनस पयापय मीठ्य वॅर्यजे

वॅरिथ कुनि नागु रब्बजे प्यठ करारा
चु नज़ुरव सुत्य लॅब्यजे साफ तारा
अँचिथ मर्गे लंजे कुनि रॉयलस प्यठ
खस्यव ख्राशव अंदुर्य कुनि छॉर्यजे वथ
पॅहॉडी आरु करनय ज़ारु पारय
चु दॅप्यज्यख अज़ हसॉ छम लारु लारय
छे कॉमा तिछ किहीं यथ छुम नु चारय
वॅरिव ऑही लग्यम युथ कामि तारय

अगर कुनि आबु छूलस निश लगी राथ
छँजल यारे खँसिथ गँज़रॉव्यजे साथ
हवा आसी मॅछ्युल मॅस्ती सु खारी
मॅदुर्य म्यवु चानि बापथ कुत्य च़ारी
लरा त्रॉविथ मत्यो जल्दी चु वॅर्यजे
वनन मंज़ यारि हुंद शेहजार पॅर्यजे
द्वहय छ्वकुनॉव्यजे मन शीनु वाने
यि क्वदरथ र्वफ छि सॉबरान दानि दाने

थकख योद डोकि कुनि ठॅहराव वॅर्यजे
पखन तापस अंदर वाहराव वॅर्यजे
वतन प्रान्यन करख योद ग्राव वॅर्यजे
चु मँज़िल छारनस पोज़ वाव वॅर्यजे
चु शहरस दूर नीर्युक ख्वश हवा चख
अमी सुत्यन पज़ी हो सीर सपुनख
चु ल्वकटुय जानुवारा दूरि बासख
सरस सुबहय फोलिथ पम्पोश शूबख

चे फेरी माय सब्जारुच नयन हुंज
लबख असरार बूजिथ नय नयन हुंज
खँटिथ मँजिल छु योदवय दूरि दूरे
फुलय डेशख थर्यन वति मूरि मूरे
अवेजान आबुशारन ज़ोर मँग्यजे
तयस प्यठ ऑस्य यिम तिम दोर मँग्यजे
चु अज़ली गाटुजारुक्य तोर मँग्यजे
यरादन पूर काह शथ पूर मँग्यजे

गँनीमथ वक्त छुय चलुवुन यि छुय पॉज
कमंद लायिन्य हवावस ज़ान शुर्य लॉज
कदुर होशस करुन्य पज़ि सातु सातय
करुन रुत आसि तथ गव जल विहातय
अशुद यिनु सॉ लगी माल्यो ह्यसुय थाव
वतन हुंजु बूटि पानय वारु परखाव
पिलव कर बालु बालय जल चु वातख
यि मँजिल सर करख वसवास त्रावख

वुडव कर शोकु मॉदानन नज़ान गछ
खँनिथ नक्शाह व्वंदस अंदर रछान गछ
छि मोहरुच तेह रंगारंग पल यि छावान
दँलीला प्रॉन्य रँछरिथ बोज़ुनावान
स्वंदर स्वनहॉर्य मंज़र योद चु डेशख
वेखुच पँज दास्ताना नँव चु बोज़ख
सन्यन सीरन सनख मदहोश सपनख
चु हालातन हुंदी पँद्य आख मेनख

प्योमुत पथ सुत्य सुय ल्वकृचार द्युतुमय
रुमन वुसजार सेक्यल्यन तार द्युतुमय
यि कँछा प्रोवमुत कम कासु ओसुम

बनोंविथ म्वख्तु हारुक हार द्युतुमय
अबलवुन्य दूह दबलवुनि रॉन्न सारेय
जवॉनी हुंद नेहल समसार द्युतुमय
कथन माने वतन आकार दित्यमय
मे सारी वॉसि हुंघ असरार दित्यमय

अमर सपुनख च्नु कॉयिम थॅव्यज़ि ह्यमथ
छु रोज़ान जिंद्रु सुय यस आसि प्रज़नथ
अमा पोज़ जिंदुगी हुंद तख छु तख्तय
शहन हुंज़ गॅर कॅमिस पॅच अस्तु अस्तय
छु वौनुमुत गाटल्यव वक्तस प्यठुय क्राव
पगाह क्या आसि ब्रौठुय कुस वुछिथ आव
यि बावुन आसि तथ पज़ि पूर परखाव
छे तूफानन अंदर अज़ नूह सुंज़ नाव

ओबुर व्वन्य आसि ज़ॅर्ययिक्य शाल वोनान
सियाह गटु आसि वापस तेज़ दोरान
लर्यन जायन वुछख बुथ्य खस्तु गॉमुत्य
दरो दीवार आसन आवुसेमुत्य
बॅरिथ लोला गुटन गामन पकान गछ
यिहँद्य तसवीर चॅश्मन मंज़ रछान गछ
रुन्नर पाठा कॅरिथ ऑही मंगान गछ
च्नु नारस मंज़ ति पोशे कुल्य ववान गछ

च्ने यादाशुक सॅदुर थोवमय मे हॉज़िर
तुलख तसवीर यिनु बा वायि वॉफिर
दूदस आसी बराबर पोन्थ मिलविथ
करुन ब्योन ब्योन च्ने छुय लोब पानु रूज़िथ
वुछिथ सूचिथ प्रज़र च्नुय अँन्यज़ि छॉरिथ
करय बो दायि खॉरा टूप्य वॉलिथ

नेवय अख श्रूच शाय़ा शूबरॉविथ
बु प्रारय शाबशिक्य मेहराब खॉरिथ

गुलालन हुंज़ फुलय आसी तयस प्यठ
कुलिम पोशन छलान बुथ शीनुची छठ
वतन अँद्य पँख्य सब्ज़ पैजि कुचु डेशख
फुलय सँदिजे हुंज़ुय यँच कौल्य छावख
वसान शामन ओतुय लोत लोत मलॉयिक
वनान तिम ज्ञान जँरियिक्य खासु लॉगिथ
सु मंज़र अक्सुनॉविथ डौल्य अँन्यज्यम
मँदुर त्रेशा ततिच यँच कौल्य अँन्यज्यम

छे जाया अख नखय पथरे अँकिस मंज़
करान छुय पोन्य अँत्यनुय हिकचनुय संज़
यिवान ओत शहनशाह ऑस्य दरशनस कृत्य
सफीरो संत सॉलॉन्य साद ह्यथ सूत्य
अँती तपु रेष्प वुछख तपसुय अंदर मस
तिमन खँचल करख यिनु सॉ हवावस
वँशीरे किच मंगुख ऑही तु शाँती
शफा ज़ख्मन, गमन यकसर दफॉयी

गछी मुमकिन सतन नागन दि नज़राह
वुछख वॉरागु मँज्य असलुक नज़ारा
क्वलन मंज़ लँहरु आसन जोरि मारान
ख्वने शीलन खँसिथ आसन नु प्रारान
भयंकर सर छि नागन अँहरुनावान
कथा तिम नागु दोरुच बोज़ुनावान
वुछख लेदुर्यन पलन लीखिथ च्चु सैज़रा
रुमस रुमस वँशीरे प्रोन थज़रा

शौंगिथ शाहमार पल छी डाफ त्रॉविथ
चु तिम बेदार वॅयज्यख हाल बॉविथ
तु दॅप्यज्यख कॅह वॅरिव चारा व्वपाया
कनस तल वारु वॅन्यज्यख म्योन दाया
शुबान प्रागाश छुय अति कोहु मालन
व्वथान छी ज़ितनि अंबर चांदि थालन
पॅकीरन हुंघ दॅपित्य लीखिथ छि गोशन
तिमय आसन करान आलव मनोशन

विशोकाये छु मातामाल व्रॅम्य सर
ग्रज़ान अख सीमिन्या बेबाक नदहर
तॅमिस ज़ामुन्न छि स्वंदर टॉठ कूरा
नन्नान नारन अंदर युथ रूस्य हूरा
वुहुर्य वॅरियस थवान त्रेशा म्वय्यसर
चॅटिथ वछ यावु कूरा नाज़े अदफर
खॅसिथ नार्यन नट्यन शौमुरावनय पान
पलव छिस नील्य लॉगिथ ज़ांह नु ठॅहरान

बॅठिस अमिकिस वुछख अख स्वर्गु दारा
यि ज़ुव छुय कायुनातुक शाहकारा
छि नागुय नाग अति आबुक नु पर्वाय
वुडुर रीशिम्य तु यिमनुय पोशि बुबराय
गुहुल शुहला तु शैहजार सरापाय
छे पातालस अंदर असमानुची छाय
अती जन्मेजियस ऑस पूज़ि हुंज़ जाय
चु अथ चकलस अॅचिथ मॅग्यजे पकन पाय

मकाना ख्वश यिवुन र्योश ज़न कुनुय ज़ोन
सोतुर आंगुन ज़ुन हुंद ज़ून वरशोन
नमन हुंद रथ छु छॉविथ सेरि सेरे
छि बोलान जानुवर अति वेरि वेरे
छु औंद पोख बे बसी हुंज दास्ताना
चखे गोमुत शराफत कुय जहाना
छे नॉरन दग तु वोलान बीनु बीना
वॅसिथ प्योमुत छु वाजे हुंद नॅगीना

किताबन हुंद वरक छॅकरिथ परेशान
न्युमुत सोरुय तु अख अख चीज़ वॉरान
गॅमुन्न खाबन अमा कवु लाय म्यान्यन
रुन्योमुत क्याज़ि म्योनुय श्रून्न दामन
सु माहोलुय अमा छ्वकु दॉद्य गोमुत
पॅकीरा नारु गजि मंज़ आवस्योमुत
चु शेरुचि दारि प्यठ बूल्या करख ना
थॅकिथ वातख शबाह अति अख बरख ना

चु मंज़ खाबस वुछख पानय शबाना
ख्वख्रुज वॅर्य वॅर्य जुवान प्रोनुय ज़माना
द्वसन हुंद थोवमुत खॉरिथ मकाना
नन्नान पां च़ादरे सुत्य जँद्रवाना
सुबह जोदल तु मस मिलि म्यूठ शामा
स्यठाह मॉसुम तु न्यश बोद राज़ दाना
शुरा माजे चवान द्वद दामु दामा
छेये पार्यव वॅलिथ सिरसॉव्य गामा

यिवान बुलबुल पिचान दमदारि लॉरिथ
निवान रिक्क्यबे मंजय पॅल्य जोंटु मॉरिथ
त्र्यन हुंज दोंक दोंखा कावु जॅशना
वसुन रुकने लमस ज़ालुन सु फ़ोवा
क्वले अंदर स्व च़लुवन्य बॅड महाना
खसुन प्वतुल्यन करुन बे वायि श्राना
सु फेरुन दॅय दूहस कुनि कुय नु शोकाह
अच्युन नेरुन तु काँसी कांह नु रोकाह

छि वुशनेरुक्य खज़ानय आखताबस
वॅरी गाशिर्य छि वखनय तथ हिसाबस
व्वथान चांदे वरक येलि ज़ून गाशस
सितारन वाँस ज़ेठान आबो ताबस
छे क्वदरथ ताह ब ताह कम चीज़ थावान
छे न्यामॅन्न कुच़ु दूहदिश मुफ्त ख्यावान
खॅटिथ दरती हुंदी छी सीर सॉरी
शुन्यस शख्ती छि व्वपदान ताबकॉरी

रंगन म्युल गव तु बास्यव आसमाना
रवाँनी मंज ज़मानन हुंद ज़माना
छु असमॉनी बलायन गाह व्वथान ठान
गहे स्वंजल खसान क्यमखाब वोनान
वनुन मुश्किल छु योदवय अथ सनान छुस
बु रॉविथ यथ शुन्यस दूहदिश नमान छुस
बु सॅद्रन कुन दवान आबे रवान छुस
कलस प्यठ बार बोरा ह्यथ खमान छुस

वॅसी अज़ो समावाता यि आलम
नु छुस कुनि अंद नय छुस तार मॅहकम
पज़र ज़ानुन स्यठाह छुय कूठ यारो

गरस पननिस करुन छुय लूठ यारो
नॅसीहत क्याह करय छुख पानु वॉतिथ
गोरूरुक सुह यिनो थावी त्रे पॉविथ
अगर लूबन रोटुख कॅह छुय नु प्रावुन
अहम मंज़ बाज़रस मा शूबि त्रावुन

अहम रावुन लबुन छुय गाशदारस
अहम गटि मंज़ छु त्रावुन गाश गारस
अहम गव काँसि बापथ पान मारुन
अहम तपसी कॅरिथ पारुद छु कारुन
चु नादुक्य पॉठ्य वॉतिथ शायि शाये
किहीं आसी नु लोज़ख म्यानि बाये
जुहुन्य यिनु कॅह ति सोचख रायि राये
नखॉ वालुन हसॉ छुय पायि पाये

यिवान स्वरमॅल्य नज़ारन रख्त लागान
वनन फवलनुक छु कुस परवानु सोज़ान
छु शामुक राज़ वातान रॉच वरने
नबस नीलिस सु तारख मालु जरने
दिवय गाशस लगान येलि आसमानस
नज़ान जालार बासान शीशु खानस
ज़गथ मातायि हुंद अदु वारु सॅर्यजे
खॅसिथ कुनि बोनि बाँथा म्योन पॅर्यजे

★ ★ ★

शालमॉरन नामदारन हुंद शहर
नावि हाँज़न च़ाक़ वार्यन हुंद शहर
गंज, बाज़र, गोशवारन हुंद शहर
फ़ौजमच़न मस्तानु वार्यन हुंद शहर
बालु ख्वनि मंज़ मालु पम्पोशन करान
ख़ूब रोयन माह जबीनन हुंद शहर
बुर्ज़ु पश वँथ्यमुत्य नखस प्यठ ह्यथ बहार
स्वनहरी कलसन मुनारन हुंद शहर

दफतरन तय अफसरन हुंद कारगाह
कारखानन बारगाहन हुंद शहर
पारकन कोछन मनोशन शूबरान
ऑनु खानन, ताशु वानन हुंद शहर
होटलन तय फॉशनन हुंद इश्तिहार
मॉर बँठ्य बँठ्य डल शिकार्यन हुंद शहर
नवजवानन वलवलन आलव दिवान
जेलखानन इनकलाबन हुंद शहर

माहरेन्या त्रॉविथ छे दँल्य आबस अंदर
लोलु मँच़ क्वसुताम च़ँज खाबस अंदर
शोरु बँर्यत्यन जलसनय अंदर रवान
स्वरखिया शोलान अखबारस अंदर
ऑलिमव सुबहय वँथिथ ऑही कँरुस
गाशु रुख शोलेयि आसमानस अंदर
कारुबारस कामि कारस सुत्य मस
च़ँद्र छल नाँपान ज़ाँपानस अंदर

स्वंदरा, मोत यस पतय सौरुय जहान
ज़िंदगी हुंघ ख़ाब ख्वनि ह्यथ छय छिवान
यारुबल ख्वर छिस छलान दग छस ब्रलान
सादुगी रेष्य वारि हुंज़ु हलमा बरान
ज़न छु मँसती मंज़ वुडान हुस्ने ज़मान
दरशनस आमुत छु कुल हिंदोस्तान
माँज़िराथा कँहवु जँरिया बाँगुरान
वीग्य त्रावान वनवनस संज़ छी करान

या ख्वजा डोख दिथ छु दर देवानखान
या छु रेडस च़ीर्य शामस कांह लमान
पँडिथा ज़ातुख पनुन पानय वुछान
या ग्यवन बाँथा छु कांह बे फ़ुक ग्यवान
कँदलनुय मंडेजि कँर्य कँर्य नवजवान
सँद्र ख्वन अँदरी छि क्याहतामथ परान
बाज़रन अंदर अमा व्वस द्रवस छि कूच
यार जोरा अख अँकिस लोला बरान

ज़ून डबि कमि ताम संद्या च़ोंग ज़ोल
हांज़ुन्या क्वछि मंज़ बरान पोत्रस छि लोल
सूफियाना साज़ो संतूरो अर्क
कापिया फिर्य फिर्य बु लेखान कँह वरक
मंज़ खयालन बो गरय वातान छुस
कुक्कलि गू गू प्यठ लंजन बोज़ान छुस
लहज़ुनुय अंदर शहर वॉतिथ प्यवान
हूर मंदोरन अंदर हुर्य क्याह तुलान

क्रालु संगरे अख शबा ठँहराव कर
गछ गगन गीरस ड्यकस पौराव कर
गगरिबल छारुन सु वीना दत च्वपौर्य
युस नु हक ख्यनुची दिवान ओस काँसि वौर्य
छार सादन हुंद सु पुलहौर्य सूर छार
ठीक येमि सुत्यन गछान आँस्य बख्तयार
बुर्जु पोथ्यन वुछतु न्वसखा कांह ज़बर
श्री बठाह छौरिथ अनुन सोरुय शहर

सादु माल्युन गछ नमस्कारा करुस
पांपरस क्वंग चारि यिथ प्रंगा गरुस
पर्बतस अँद्य अँद्य ज़ुचन हुंद ज़ूल कर
यड बँरिथ चांदे डलन मंज़ सॉल कर
आलमाह नोव पानु अज़ आबाद कर
आसि युस सार्यन गरन हुंद रॉछदर
दर नँगीन तन बोनि हवुहस नॉव्यजे
यार छौरिथ कुसमथा अज़मॉव्यजे

छारतन बागे दिलावर छारतन
ओर अछुर डेशख तु माले तारतन
तँत्य परेशान लॉव्य वुछ अरमान म्यॉन्य
कृत्य छँकरिथ व्वं वुछुख वौरान म्यॉन्य
मॉर अंदर म्यॉन्य मॉसुम खाब छार
आसि खाबस योद लोतुय वँर्यज्यन हुशार
क्याह वनय गँयि गालखातस पँरिथि वन
छुम ततुर वोथुमुत ततुर तेलान रुमन

★ ★ ★

लॅरा हुथ जायि खॉरिथ ऑस मंज़ बाग
अमा सोंतस छु कवु फोरमुत ग्वडय माग
सलामुन्य द्यद नसॉ जॉहिर गछान अज़
तु दारे हॉर द्यद छनु व्वन्य ब्यहान अज़
निशानन हुंद नोनुय छुनु कांह निशाना
श्वकेमुन्न वथ तु पकुवुन्य वानु लॉना
छु आमुत सोचु दॅरियावन मे सॅहलाब
तु यादाशस गछान हन हन छि बेताब

अनुन खोसा सिन्युक खॉरस वॅरिथ रज़
सुली फाकय फरी नेरुन बॅनिथ श्रज़
शुरिन्य बूज़िथ सु पबत शोकु लारुन
छर्यव अथवय नफ्स खारुन संदारुन
न रोशुन काँसि नय अथु काँसि दारुन
शुर्यन सतुन शुरा वक्ता गुज़ारुन
हखा बूज़िथ वसुन मँज्य यारबल कुन
पशस प्यठ नोव पतंग असमॉन्य खारुन

बु शुपयनु क्यव वनव ललुनोवमुत छुस
मोदुर मस बॉल्य आरव चोवमुत छुस
वनन हुंद मोत फिज़ा मे छोवमुत छुम
दिलुक अहवाल यार्यन बोवमुत छुम
पॅकिथ पॉदुल्य वतन, वतु आसु ज़ैठान
अम्बुर्य चूँठा ख्यवान वुठ ऑस्य मेठान
वंदस सख्ती तु मूसिम ज़म हरीरा
गज़य वॉरी प्यवान तेलि ओस शीना

ज्यनय मौजा तैमिस ओस पोशि कुज नाव
जबर यादाश कथ वननुक स्यठाह चाव
रछान ऑसुम पेचन्य तस राजि रेन्य नाव
करान ऑस सारिन्य यजथ तु रुत बाव
स्यठाह हमदर्द ओस कॉलास कौल मोल
ब्रलान सोपुनस अंदर छुम तस वुछिथ लोल
अकीदत सारिन्य अज पूर च्य हाव
तिहुंद रुत नाव अज बर संग ल्यखनाव

छु लोहूरुक सफर सफरन अंदर याद
तरान ऑस्य बानुहॉल्य गाह मुजफराबाद
सु अख दोरा अँछन तल दीदमां छुम
च्यतस अंदर मे रामायण समान छुम
सु रावी कुन दवुन सुबहॉय श्रानस
कुल्यन तल ख्वश गफा पतु च्नीर्य शामस
फवलान शाह आलमी दरवाजुकी गुल
लंजन खँस्य खँस्य नचान तति ऑस्य बुलबुल

सु रोशन लाल पंजाबुक गजुल ख्वान
सु मदरासुक नरायण देवता मान
नचेकीता र्योशा तस सुत्य शूबान
शोम्बूनाथा कलामा राहते जान
सु वीदानंद वीदन गाशु तारुख
सु अरबीदान सँन्यॉस्या शुमारुक
सु ईशर चंद्रा फलसफय व्यच्यारुक
सु थोद ऑलिम तु सॉथी गाटुजारुक

हुकमरानव लितुर लॉज माजि सीनस
वॅरिथ आज़ाद दल तुलिहस जबीनस
कबीरुन तय नज़ीरुन देस मोरुख
शरद तय खुसरवस सोन नेज़ु तोरुख
रुहे नानक वतन प्यठ काँपुनोवुख
सु गंगो जमनुकुय तहज़ीब गोलुख
लछन हुंघ लछ गॅछिथ बे गर, गरे द्राय
नॅविस हिंदोस्तानस चाक तेल्याय ।

करख ना राज़ु होंज़ो मेहरबॉनी
करान खँदमत बु रोज़य वॉसि चॉनी
बसान शहरस अंदर महबूब म्यॉनी
फिदा वॅरमुन्न तॅमिस पथ छम जवॉनी
स्व आसी अज़ वतन म्यान्यन वुछॉनी
स्यठाह गाटुज तु रोय छुस अँत्र दॉनी
फकत लोलाह छु बोरमुत पानुवॉनी
दॅलीला रोज़ि पथ प्रेमच कहॉनी

तॅमिस हूरे मे गव वुछनस ज़माना
स्यठाह ख्वशवन्य मॅछिज काँत्राह छि दाना
सॅनिथ गॉमुन्न तॅमिस छय माय म्यॉनी
वनान ऑसुम 'चु छुख ना यारि जॉनी'
तॅमिस दूरी गॅडिथ गुल्य कर नमस्कार
तु दॅप्यज़्यस 'वारु छा सॉ चोन गरुबार'
निशानय म्यानि सुती परज़ुनावी
करी वॅहवा तु कंदी कुलचि ख्यावी

मुहब्बत ज़िंदगी छुय माने बख़्शान
कॅरिथ सैकल रुहस ऑना बनावान
तॅमिस आसन गछान वुनि ब्रॉत्य म्यॉनी
शेछा बूज़िथ यियस मा नॅव जवॉनी
खबर वॅन्यज़्यस तु दॅप्यज़्यस वारु छख सॉ
पकान प्रानी तमी अनहारु छख सॉ
चु कॅर्यज़्यस ज़ारु पारा आय मॅग्यज़्यस
अमा पोज़ चूरि चूरी दाय वॅन्यज़्यस

दिलस म्यॉनिस दिन्नॉयथ थफ गज़ॉली
बु चाने दादि सॅन्यॉस्या गुपॉली
स्वखल एहसास पानय नॅदरि तुल तख
अॅछन मंज़ पोशिवुन्य अनहार अनतख
विसुन चोनय तु तिम कॅह सात चॉनी
तिमय सरमायि दौलथ स्वय छे म्यॉनी
जवॉनी हुंद मन्नर शोन्नर तु मॅस्यती
म्वखस चॉनिस छे मा फूलिथ व्वदॉसी

खयालन मंज़ दूहय म्यानन वुज़ां छख
करख ना विह तु साथा यूर्य वातख
वतन चान्यन दवान ननु वोर नेरय
युथुय डेशथ बु शेरे ताज शेरय
ठॅरी ठॅर्य छिम कथन खुर्यनाव आमन्न
स्यठाह गॉसिल दिलन अंदर सम्यामुन्न
अमा कुस कासि खुर कुस आसि रुस्तुम
फकथ सॉरी छि हावान पॉन्य यायुम

दिलस अंदर खँटिथ यारानु चोनुय
नखय वालान छुस दूह दूह पनोनुय
छु रुम रुम मुश्कनावान नाव चोनुय
चे लँग्यनय आय, जुव छुय पेश म्योनुय
चे ते शायद यि वेह तेलान आसी
अँछर वालन ज़हर कहरान आसी
छु गाहे वख चलान मीज़ानुवुय दूर
हरान पन योद ज़्यवान पोज़ हर्दु पोंपूर

परेशॉनी कॅशीरे बागि आमुन्न
वेखुन्न ज़ाथाह वनन अंदर छि ज़ामुन्न
चलान छय गोलि यिनु सॉ मारु सपनख
पखन यिनु कुफ लगी नाकारु सपनख
डरय बासी अगर वुफु वार कॅर्यजे
कनॉदरि सानि वापस तार कॅर्यजे
छु सॉनिस आंगनस नागा ब दसगाह
वँसिथ तमि नागु चेज़ि अख त्रेशि दामा

सुबह वुफ दिथ तॅमिस वन सॉर्य हालाथ
च्यतस यिनु पावहस बेयि प्रॉन्य वाकाथ
तसुंद अहवाल सोरुय याद थॉविथ
वन्न तँहँदी च़ कुनि किन्य अँन्यज़ि छॉरिथ
इजाज़थ ह्यथ तसुंद तसवीर अँन्यज़्यम
निशाना कांह च़ बा तदबीर अँन्यज़्यम
पशस तिहँदिस बिहिथ वुछिजे नज़ारा
लँबिथ अँन्यज़्यन सु असुवुन रुत शहारा

बलान छ्वख छी वलेकिन कथ छि रोज़ान
किहीं मतु रूज़्यतन पोज़ सथ छि रोज़ान
दुदुर इनसॉन्य कदरन क्याज़ि चामुत
जमानस सॉर्यसुय खुर क्याज़ि आमुत
रेष्यन हुँद्य केंह वचन अँन्यज़्यम चु छॉरिथ
बु प्रारय लोलुकी दसवानु पॉरिथ
बु तोत तामथ बहारस रोज़ प्रारन
फवल्यम येलि ताज़ फुलया रेगज़ारन

व्वलो हा राज़ होंज़ो दूर नेरव
स्यठाह वॉनाख जायन चूरि फेरव
हु ज़ा शुर कुस सना त्रॉविथ छु द्रामुत
कॉमिस सन ज़ॉलिमस युथ वंदु आमुत
अँमिस इनसॉनियथ रोयस छि पेडान
छु ज़गतस सोपनु किस मंज़ फ़ुस्तु डेशान
यि शोरो शर वुछिथ छुय काँपुन्योमुत
छु यथ वॉरान जाये बागि आमुत

करॉयो गूर हा जानानु गोबरो
चु यथ वॉरान जाये क्याज़ि आखो
अमा कॅम्य संगदिलन त्रोवुख वते प्यठ
हवस कारव चु सोवुख खाकसुय प्यठ
रवने मंज़लिस अंदर हो हो करॉयो
अनंतनागुक बु वतने गुर अनॉयो
मे वन सॉ कुस रछी कुस शीर लागी
चे सहरावन अंदर कुस बोलुनावी

त्रे ऑसस माजि हुंज बब कुस साँ त्रावी
गुगॉ मंजलिस अंदर कुस मालि सावी
बरी कुस लोल मनि अंदर त्रे थावी
त्रे ऑंगजे थफ वॅरिथ कुस जून हावी
ड्यकस दिथ मीठ्य कुस साँ सम्बुलावी
रॅटिथ नालय, नखस कुस ललुनावी
छि फुट्यमुत्य प्रॉन्य परमानय वनय क्या
छॅरी साँरी छि पैमानय वनय क्या

खये अंदर पेमुत्र लाशा छि वॅम्यसुंज
छे फॅटमुत्र लाय आशायन यि वॅम्य सुंज
पेमुत्य ऐवान इनसाफुक्य छि पॅथरिस
कॅडी कॅड्य क्याजि खॅत्यमुत्य बूमि साँरिस
वुछान साँरी मगर जूरथ नु काँसी
दज्जान दुनिया मगर फुरसथ नु काँसी
अमा कांह हातमा गछि ना साँ बेदार
छि हॉकिम चूरि कोनूनय छु खुर्यदार

खोलूसस म्वल छु वोथमुत दर जमानु
वसान छय लाशि दॅरियावन शबानु
छि खॅत्यमुत्य नारु तॅत्य बुतरॉत्र काँत्याह
क्वलन हिर्यवोल होखमुत छुख नु दसगाह
छु वुडरन सीनु बिर्यान शाल वोरान
कथा काँसी नसाँ छय साफ फोरान
स्वंदर नगरन अंदर द्रॉठाक फेरान
वॅरिथ लूठा, मुहिथ असमथ छु नेरान

नन्नान वुर्यानु सॉरी कस छु परवाय
जॅमीनो ज़र ज़नानन हुंघ वेखुत्य न्याय
जवानन हुंज़ जमाथा कोर लारान
वनान यिमनुय प्यठन अँड्य दिल छि हारान
छु नफ्सुक नार तेज़ान सादुगी लूठ
नशस अंदर छि लॉगिथ मोतुकी सूठ
ज़मानस क्याज़ि लीखिथ रो-सियोँही
ड्यकस लीखिथ छि गाशस मंज़ तबॉही

मलॉयिक खोफु की प्रथ जायि फेरान
छि नैदरे मंज़ वॅरिथ खश साफ नेरान
छु मुल्खाह यथ ज़मीनस स्वन छु व्वपदान
मगर द्रागन अंदर अति लुख परेशान
यि मुल्खाह, आबुकी बॅर्य बॅर्य खज़ानय
मगर अति त्रेशि हतिनुय ज्यव दज़ानय
अथस येलि ज़ाथ वुछनय क्याह करख वन
सरफ अँदरी त्रे बुछनय क्याह करख वन

महा नगरन छु वोलमुत नाल हाये
तरक्की योद छि बासान जायि जाये
गरन अंदर छि बासान दुह्य छ्यवय हिश
छे बासान पानुवन्य अज़ सारिनुय रुश
हवा छुनु दारि पटिनुय पान छावान
अँकिस अख कांह नु अँदरिम हाल बावान
छु तहज़ीबस गोमुत कुस तां वकानय
गरन अंदर अँचिथ रावां ठिकानय

कुल्यन गॉमुन्न मॅशिथ पनुनी छि पहचान
अँछन अंदर यिवान छुनु न्यूल असमान
सियाह रॉन्न अंदर इनसान वोलान
कुमुर्य कस्तूर खालुय व्वन्य छि बोलान
ज़मीनस ताल दँज़मुन्न नम छि नीलान
यि दुनिया आयि पनुने छुय नु जीलान
सफर वॅर्य वॅर्य छु मँज़िल वारु दूरान
वॅरिथ मेहनत करोरन छुय नु पूरान

सियाह स्वन सारुने कमु लॉलु नेरान
गछान छख कॉलु गिर्दाबन छे फेरान
दवा दाद्यन छु मा दरमान सपदान
ज़हर खेय खेय ज़ख्म वोलान वोलान
सु मॉलन हुंद अमा कवु ह्वल ह्वलय रोव
जवॉनी हुंद मन्नर तय वलवलय रोव
दज़ान दरती छु मुर मा वारु वारय
गछ्यस मा फान, सपद्यस योद नु चारय

दहिस अंदर सियाह सुबहुच महारॉन्य
गमन अंदर च्रमान शामुच छि मॅल्यकान्य
संगरमालन गुल्यन ज़ोलानु त्रॉविख
छम्बन छालन सब्ज तुल्य ताम ज़ॉलिख
ह्यडर ज़ाथा वॅथिथ आमुन्न छि वेखच्युय
यि दरती क्याज़ि गॉमुन्न आरु कॉच्युय
गौरुरस मंज़ स्यज़र संतोश कोत गव
व्वमेदन हुंज़ स्व ह्यमथ जोश कोत गव

कोरुन अल पल शुरिस ज़्यव आयि जल जल
कदम कडनुक करान ओस पानु हल हल
यिथिस जगतस अंदर वॅम्य वातुनोवुस
अमा वॅम्य बुज़दिलन यथ जायि सोवुस
बु सोपनस मंज़ गिंदान ओसुस खबर कथ
मे ऑसुम जिंदगी प्यठ वारियाह सथ
वॅनिथ हालाथ यिम साँरी खतरनाक
यि बूज़िथ म्योन माँसुम सीनु गव चाक

खँसिथ हुथ संगुरस प्यठ त्राव साँ मे
ग्रदन जानावरन पुशराव साँ मे
बु यथ जन्मस शुरुय व्वन्य रोज़ु वाँसे
वुछम यिनु कांह तु अथि यिमु मा बु काँसे
हवा आस्यम ख्यनस वथुरावनस शीन
यि साँरुय क्वदरथा रोज़्यम मे ताँबीन
अँज़्युक आदम बु पानस दूर थावन
यि आलम वँद्य वँदी बो अँहरुनावन

बु साँद्रवार फिज़हस लोज़ु करने
नयस्तानन बु फेरय साँल करने
छे बेहतर दूस्ती अज़ अँछदरन सुत्य
सुहन तय हापतन जानावरन सुत्य
रछन मे शीनु मँहनिय्य गूर करनम
फिरिशतय जोलि मंज़ इनसाफ बरनम
बु गालख तोसबुक्य नाकारु हालव
मुहब्बतु क्यन ठिकानन लायि आलव

यि क्वदरतुची किताबा वारु मुच्चरिथ
थवख प्रॉनी पज़र बेयि वारु शीरिथ
बु पॉज़न सुत्य फेरय आसमानस
चुह्यन मंज़ छठ कडय कुलहुम जहानस
दिलुक्य एहसास शेलन चित्रनॉविथ
पनुन्य मूसिम थवख पानय सम्बॉलिथ
मे तारख नब यियम अदु तूर्य गारान
बु नेरस योरु ख्वशवुन्य नगमु वायान

अनन येलि जानुवर फल फूल छॉरिथ
थवन मसतस मे रीशिम वाँकु पॉरिथ
इशारन मंज़ मे बावन सीर ज़गतुक्य
फुटन सरहद थदन इमकान लोलुक्य
पकान कुल्य तेहरिवुय पेठ्य आसु नेरान
लंजन प्यठ ऑल्य नॅव्य नॅव्य आसि येरान
वटख बीमुक्य तु वॅहमुक्य सॉर्य दफ्तर
यलय त्रावख सरी इनसाफु आगर

मे तखलीकुक्य रॅसिल्य सरमद थनु प्यन
तु नूरुक्य बे बहा असरार व्वतलन
च़टख ज़ोलानु इनसानस सरासर
करख आज़ाद सॉरी ज़ानु आगर
नबस प्यठ रोज़ु शोलान गाशु तारुक
ज़माना नोव रथा खारन खलूसुक
बॅदी हुंद्य मूल गॉलिथ वारु सॉरी
करख नीकी हुंदी दफ्तर बु जॉरी

★ ★ ★ ★ ★

वचुन

राज़ु होंज़ा ब्यूठ कनु दारे
लोलु वारे दारि मुच्चराव
आयि वनवान कॅतिजि तु हारे
लोलु वारे दारि मुच्चराव

यार कुस ताम यारस छारे
रंगु वासन पौराव कर
हंगु दारस कूला खारे
लोलु वारे दारि मुच्चराव

तार अमृथ नारे नारे
गाशु ब्रारे दर्शुन प्राव
सूर सासस लाल मा चारे
लोलु वारे दारि मुच्चराव

गछि दॅय योद पानय यारे
ज्यतु नारस ख्वर ठहराव
मजबूरस शायद गारे
लोलु वारे दारि मुच्चराव

★ ★ ★ ★ ★

नग्मु

होशि हतिनुय लोल बावान आस बो
रोशि पथरे पोश छावान आस बो
नारु गजि मंज़ चंदनुक मुश्काह वुछुम
चॅल्यमुत्यन दिल रंज़ुनावान आस बो

समयि यिरवुन्य नावि वुज़ुनोवुम ज़िहन
शेरने बुथ द्रास पानय कोसुमन
ह्यकमथा स्वय आजमावान आस बो
लोलु मोत सुय सोंथ छावान आस बो

पज़रु म्वखु चव ना ज़हर स्वकरातनुय
फ़ासि खोत ईसा तु वुछ अर्सातनुय
ज़हर मँज़्य अमृथ व्यचारान आस बो
दोसदारन पानु गारान आस बो

वॅथरु वॅथरय पनु वॅथुर सौबरॉव्य तव
अमनु सुत्य रेप्य वॉर बेयि मुश्कॉव्य तव
दूर पैम्यत्यन नाद लायान आस बो
बेय तिथय पॉठ्य सोंथ छावान आस बो

★ ★ ★ ★ ★

नज़रानु
हा अलमदारु सानि

चारुकि नुंदु बानि
थोद व्वथ रेशि सानि
कॅयमूह कि ग्वसानि
रुवपु वन के लानि
लोलुकि स्पंदु वानि
वेथि हुंदि श्रुच्चि पानि
कॉशिरि आगु म्यानि
रेष्य वारि कॅम्य द्युत नार

हनि हनि जॉजिख
कनि कनि वॉजिख
तँद्यजन लॉजिख
कूट्यन खॉजिख
लोट पॉठ्य गॉजिख
रच्चि रच्चि गव लुरु पार
रेष्य वारि कॅम्य द्युत नार

बारगाहे ऑली
स्वनु अंजॉली
चमर तु त्रॉली
पंजरन जॉली
मीनार डॉली
चोर बाम चॉली
कॅम्य जॉलिमन वन जॉज
कस ओस सोन खारु खार
रेष्य वारि कॅम्य द्युत नार

श्रुक्य चॉन्य सब्जार
जिगुरस शेहजार
तमहस लारु लार
बदुलय समसार
स्वर्गुक्य सेतार
कॅम्य चॅट वज़ुवन्य तार
रेष्य वारि कॅम्य द्युत नार

अथुवास सोनुय
सुम सोथ प्रोनुय
चोनुय तु म्योनुय
लसुन बसोनुय
असुन ग्यवोनुय
रुत पोशि वोनुय
कुस व्यसु तोनुय
बागन अन्नोनुय
खेतन पकोनुय
रादन वुछोनुय
आदन पनोनुय
पॉथुर गिंदोनुय
दानस प्यवोनुय
क्वदरॅच्च सनोनुय
यी ओस सोनुय कार
रेष्य वारि कॅम्य द्युत नार

कॅम्य वॅर माँसुमन लाय
कति वॅछ गोलि ददराय
कॅम्य मॅछ स्वंदरन हाय
गोशान कॅम्य छुन्य क्राय

हनि हनि कँड्य तेल्याय
गाशस प्यठ पेयि छाय
गरदे बुज्य गँयि माय
गर वाल्यन पर लार
रेष्य वारि कँम्य द्युत नार

नुंद रेष्य लालो
बरयो थालो
म्वख्तय मालो
दूह चॉन्य पालो
लॅग्यमुत्य ज़ालो
कोताह ज़ालो
फुचमच्चि नावि दितु तार
रेष्य वारि कँम्य द्युत नार

★ ★ ★ ★ ★

अख तसवीर

खुर्यदार तंग सडक छि
सौर्यपिन्य हिश होल होल पॅकिथ
मकानु बरस तल रूज़िथ हिश गॉमुन्न
छतुक पंखु - कालु चॅक्र छु
हंगतु मंगु रोटु गोमुत
कमि ताम सैकि सहरावुच छ्वपु छय
सौर्यसुय कमरस तेलेमुन्न
कमरु दारि मँज्य छे क्रकु ज़ोरु अंदर अन्नान
छ्वचि, ज़ेछि तु खॅर्यवुनि क्रकु
अमा पोज़ बु अमि सारी निशि बे खबर
ज़ेहनु किस वॅसी कैनवासस प्यठ
पनुनि जिंदगी हुंद अडु गोर मडु गोर तसवीर
बनावान बनावान व्वदौस्य

★ ★ ★ ★ ★

पनु पोंपरिस कुन

पनु पोंपरि कथ छुख कलु ठासान
गतु ग्यूर करान कनि देवारन
मंदोरि थज़ी पखु वाव करान
जेछर योदवय छुस ज्यूठ स्यठाह
पोज़ रोज़न वॉल्य छि अति मजबूर

कड वाश पखन वुछ सुबहुक परतव
बाशि करान क्याहताम परान
अनहार वुज़ान खामोश कुल्यन
पनु वँथुर छि सॉरी वुनि नैदरी
छ्वपि हुंद राजुत, छ्यकु ओबरप्रचि
नार्यल कुल्यन क्याहताम पृछान
नबु नीलु सरस गतु ग्यूर करान

थज़ि टंकी प्यठ जानावाराह
ज़न स्वपनस मंज़ असमॉन्य वुफान
छुनु सिरिं ज़ुचव वुज़नावुन ह्योतमुत
केसुर्य पान
अखताबु छु सखरान नालु मँतिस
प्रारां ऊषा

व्वलु नेर न्यबर, कनि खम्बर्यन कथ छुख मॉल बरान
येति हॉरिथ गँयि कम कम दिवता
कृत्यव वलु वीरव फेकि खे खे
वक्तुक्य ज़हराबु दहानस बँर्य

पनु पोंपरि गथ कर आकाशस
सोंजलि पेठ्य जंगलव, छाला तुज
यथ ब्रह्मांडस छुनु आँथुय कांह

व्वलु यूर्य दमाह कथ बाथ करव
बु ति आमुत दूरि मुसाफिर छुस
गरि छुस द्रामुत ननुवोर चलान

मनुचन दार्यन छिनु आसान तौर्य
छुम आँनु अँछन शिंक्या तेलान
पख यूर्य मे निश कवु खोचान छुख
यथ पोशि कुलिस वन म्यौन्य व्यथा
हुथ चँडी दारस नज़रा कर
महिशास्वर कुत्य छि वुनि फेरान
वुनि स्यज़रस पज़रस सुत्य छे द्य
यथ शहरस मंज़ कति रोजुन छुम
कुस मँज़िल म्योन पताह कति छुम

पनु पोंपरि व्वलु पँहरा बेहमव
दरती ह्योत सिर्यस आलव द्युन
ऊषा खँच नॉविथ शंगरँप्य पान
गेशमावुन बुथ ह्योत कोह मालव
पनु पोंपरि कथ छुख कलु ठासान

★ ★ ★ ★ ★

खामोश शायिर

द्यानस मंज ओस पोशि कुला अख
लॉगिथ शेरि गुलन हुंद ताज
पृछुमस वन साँ कुस छुख बाया ?
मुश्काह छटवुन वोनुनम बोज़
'पानिच सिरिच मिलवन क्वस तां
पन अछर, पोन्थ कल्पना
दरती हुंद छुस ल्वकटुय सोपुना
व्वपरन मंज छुस हेनु ह्यू आमुत
लूकन हुंदि बापथ छुस ज़िंदय
गरु रोस्तुय रोज़ान छुस नेबरय
नावस, शौहरस सृत्य दुय छम
बु ति छुस अख मंज़ूम दॅलीला
वॅम्य साँ दुनिया ज़ोनुय म्योन'

★ ★ ★ ★ ★

चमन वुज़नावि

श्वंगान येलि राथ बालन शांद थॉविथ
व्वथान म्यान्यन खयालन ठान लोत लोत
गॉछिथ आज़ाद बे परवा कलम म्योन
बहारन नालु दी दी शेरि लागान

नबस प्यठ तारकन हुंज़ु छालु डीशिथ
वछस तल रूठ्यमुत्य अरमान तोशान
खयालन हुंघ मलख नेरान सॉलस
गहे दूगन्यार डीशिथ होल गंडान दोर
गहे सनिरस अंदर म्वख्तस दिवान ज़ॉल्य
गहे शशदर वुछान रूज़िथ छि हॉरान
अमा यथ कालु गटि गाशुक पताह छा ?
छु खुर आमृत निज़ामस डेंजि हुंघ पॉठ्य
चु पनु तॅल्य डीज अनतस डेंजि तॅल्य पन

सनून गोछ प्रथ अकाह यथ कायनातस
गरज़ त्रॉविथ बरुन गोछ ग्वड हयातस
गुलॉमी हँघ च़ु कूत्य बलनुक दवा गोछ
रवा गोछ मायि हुंद पैमानु आसुन
स्वखुक सामानु गोछ व्वन्य आम आसुन

बहारस ग्वड बरुन छुनु केंह ति आसान
यि गव स्वकरातु सुंघ पॉठ्य ज़हर च़ालुन
यि गव दारस खसुन मनसूरनी पॉठ्य
यि गव फ्यूचक बनून पानस करुन सूर
यि गव नेरुन पकुन तलवारि दारे
यि गव ऑशस तु आरामास करुन बस

तवय यथ रॉच्च मंज येलि गम व्वथान थोद
दिलय रावान वुछ्य वुछ्य अपजिकुय राज
रगन मंज खून ह्यथ सँहलाब जोशुक
नँविस सुबहस थवान सामानु शीरिथ
हवा रिंगा वनान मे ति मा छु आराम
बु छस रातस छ्वकन मँहलामु लागान
तिमन हो हो करान छस यिम छि थँक्यमुत्य
द्वहस यिम मेहनतुक्य गुल शूबरावान
छे यिमु पथ स्यठाह समसारस अंदर
तिमन गमगीन हूरन छस दिवान मीठ्य

बु छस मॉसुम शुर्यन रुत्य खाब हावान
तिमन गोछ होशि होत अँछ गाश आसुन
तिमन गोछ आशि हुंद प्रागाश आसुन
तवय शबनम रछान छस मालु वँर्य वँर्य
गुलन व्वशलुन दिवान छस तिहँदि बापथ
ज्वयन मंज आब सारान छांछु वारन
खहन मंज मायि खारान दां हेल्यन छस

यि बूजिथ सथ दिलस सपदेयि वारा
सौरिम अँदरी पनुन्य तिम दोस काँत्याह
छि यिम इनसॉनियँच्च रुत्य जामु शेरान
छि यिम अदबस अमारुक पोट छावान
छि यिम हुस्नस तु लोलस शेरि लागान
छि यिम दीनुक्य तु दर्मुक्य न्याय सावान
छि यिम नजरानु जुव दिथ टॉठ्य पनुनी
दपान मज़लूम व्वन्य कांह गोछ नु रोजुन

कमुय काला गॅछिथ व्वथ रात थोद व्वन्य
व्वथन थोद नॅदरि हॅत्य बेदार सपदन
पथर अपज़िक्क्य महल प्यन पॉन्य पानय
चमन वुज़नावि कौत्याह नग्म् लोत लोत

फवलन वुन्य टूर्य कौत्या मुशिक वाहरन
शुर्यन शबनॅम्य वुठन प्यठ बाशि व्वतलन
गुलन ज्यव यियि तु सब्जस म्बख्तु छॅकरन
कुकिल गेवि राग सुबहुक दाग शेहलन
बेहन रातुक्य मलॉयिक चूरि लोब कुन
हॅटिस र्वनि जानवारन वुन्य वजुन ह्यन
ज़मानस गाश तय फवलि नूर बालन
मच्चर शोकुक्य अॅशिस कित्य बानु शेरन
ग्वंघन अँघ अँघ छिटल पोंपूर्य फेरन
नव्यन बागन नॅव्य नॅव्य ऑल्य येरन
बहारन छाय कौसिथ मायि हॅत्य कूत्य
संगर मालन नबस प्यठ जाय शेरन

★ ★ ★ ★ ★

जिंदगी

मोदुर ज़हर छु थारि ... एतिबार कर
शुरा ग्रटस छु खारि ... एतिबार कर
सफर छु नारि नारि ... एतिबार कर
छु शीशि हम शकार ... एतिबार कर
लॅरा छि रंगु वारि ... एतिबार कर
छु नार दारि दारि ... एतिबार कर
ज्यनस मरन छु बार ... एतिबार कर
पकुन छु वारि वारि ... एतिबार कर

★ ★ ★ ★ ★

मँत्य आब

वूठ मत्योमुत मंज़ मॉदानस
साँरी पानस पानस लॉर्य
यस दिये कारि वुठन वुठकाव्यस
यस लागि तस लागि सरकाँरी

पुरसिश किछ साँ
साँरी मॉलिक हॉकिम साँरी
गरु गरु राज
अलु शहरस साँरी मोहताज

अशराफन येति मुश्किल रोजुन
ज़ैर्य शहरस मंज़ कस क्या बोजुन
यस युस ख्वश गछि सुय गज़ लाग्यस
साँरी गाटुल्य साँरी चॉर्य
बूट कलस प्यठ ख्वर ननुवाँर्य

कालू मोत ह्यू बेछान बासान
आँद पोक सोरुय
काव अय छँल्यज्यन सज़ु तय साबप्रनि
क्रेहन्यर त्राव्या ?
वूठ मत्योमुत मंज़ मॉदानस
साँरी पानस पानस लॉर्य

★ ★ ★ ★ ★

नज़्म

स्वरमॅल्य टार्यव शोख यिम्बुरज़ल
आयि तु गव माहोल बदल
नोव लोग मूडस आय
नखु आव यावन राय
नेरि तु फेर्यस कूत

★★★

फिर्य फिर्य द्रायि वुछान
मुश्कुन्य अम्बर चॅल्य
आलव दिमुहस वाय
अलमन खोत सॅहलाब
रावन त्योल तेल्योम

★★★★★

बालु कोल्य !

शोख बावथ छे ड्यकस
म्वख छुय शुहुल, हय बालु कोल्य !
राथ आँसुख यिछ, तिछुय आसख पगाह
वॅरियि वादन योद पॅचिख
थॅचखुय नु ज़ांह
चोन यावुन हरनु आव
दामु छय रॅटमुन्न च्ने व्यथ

शीनु मान्यन शीर चथ
कोत च़लान छख नॉर्य दॅज़
छुय लेखिथ अख दास्ताना दामनस
सोचि क्यन सॅद्रन तुलिथ सरपोश थोद
शूब वुन्य रीशम्य हवस वुज़वान छख
बालु दामुन्य सुम कडान मस्तस वॅछुख
पूर्य किन्य ऊषायि छॅक्यनय रंगु टॉक्य
चानि ख्वनि मंज़ रामु गुरनव लोब ज़न्म
तीलु सडकन चोन यावुन ब्रूठ्य आव
वावु माला पॅच तु वॅरिनय मीठ्य च्ने
स्वंदरा अज़ कालुची हॉरान हिश
चानि बॅठ्य बॅठ्य यादु वॅत्रिस द्यल तुलान
तेज़ दज़वुन्य रेह सपुज़ फलवॉय हिश
दिथ पलव दॉरिथ बॅठिस वॅछु श्रानु पुच्य
रॉछ वॅरथस नोवथस मखमॅल्य बदन
चॉन्य विह वुछ पोशि पथर्यव
त्रास ख्योख
सीनु हावान द्रायि मसवल शामु पॅत्य
तारकव वुछ चोन रव पॅक्य सुत्य सुत्य
दास्तानव थॉव्य पकवुन्य नागु राद

रूदु श्रान्यव म्वख्तु जोर चॉनिस बुथिस
कुल्य लंजव कोरहय शुहुल ग्रश्मस अंदर
समयि सडकव आय मोंगहय पायि बोड

चोन रख येलि हर्द हवहन दूँछरोव
चोन असमथ टोट गव नीलिस नबस
हॉरिजव खोट चानि बदनुक बोस्तान

ज़हरु सागर बेयि मंदुन
अमृथ कलश छाँडिथ अनुन
तोसबुक्य ज़ोलानु च़ठ दरती च़वपॉर्य

चानि दँस्य कॉत्याह सदम आसान गँय
चानि वसवुनि शोकु खॉरिम बोठ मे दूह
चॉन्य स्वरनय अज़ ति छुस बोज़ां दूहय
पोज़ ज़मानुक्य नारु तँत्य छिम क्या वनय
बस ब्रंज़िस अँकिसुय कदम ठँहराव व्वन्य
म्यानि वनवासुक छु फोटमुत नारु बाल

★ ★ ★ ★ ★

लेबल

फुलया छँन्न क्या सौंदरवार
कुलि पथ कुलि दस्तार
संगरन खंगरन वथरिथ थोवमुत
शंकर सुंद अटहास
बालन हुंद सँन्यास
सँदियन हुंद यितिहास
अथि ह्यथ सरस्वथ ह्यनु आमुन्न
बेयि अज़ नवि सरु मा ज़ामुन्न
पां च़ादर ह्यथ मनु मंज़लस
ऑनस अंदर ज़ीठ दँलील
नपु नपु करवुन्य शीतल नाग

ही मालुक्य छी अज़ली जूग्य
तन साफ़ तु खयि रोस व्वंदु मेछर
फोस वापस आमुत सँदरन हुंद
नबु नारस पाट्यू आकारा
लेबल छख लँजमुन्न माइग्रेंट पोज़

★ ★ ★ ★ ★

मॉसुम पां फ्योर

पां फेरि, दूह छिनु सेद्य यिनु वॉल्य
वक्तस वॅछमुच्च वॅक्रु चक्र
दुबुरायन नीलेमुत्य नम
मति हावय, छ्वकु दॉव्य जिगर
अॅश वानि छलन मा चोन वजूद

खूनी नालस यथ गटुकारस
क्वदरथ वॅकरिनय पानय रॉछ
खोफुक्य प्रहदर नॉली नाल
बॉरव सॉरी सुत्य च्चे छिय

पां फेरि, कुस मॉज़िल छुय चोन
सती सरस लोगमुत छुम ग्रोन
परदेसस मंज़ कोर लगख
अकि दारु खसख बेयि दारु वसख
तथ बुतरॉच्च गछन ना चाक
यथ मंज़ चोन जुवुन मुश्किल
लसुन मुश्किल बसुन मुश्किल

कटु काल छे राथ, त्रॅहर्योमुत साथ
तफरीकन हुंज़ तेलेयि वुनल
कांगुर फुटमुच्च अथि छय सुत्य
हू हू सर्दी, सख कठकार
कुस सॉ दुश्मन, कुस सॉ यार

पां फेरि, र्वपु संज़ तन प्रॅथिनय
मनु सर चोन बॅनिन संगलाख
तॅथ्य मंज़ फोल्यानय दुनिया चोन
वॅथ्यमुत्य योदवय छिम परगॉल्य
ऑही म्यॉन्य च्ने पॅकिनय सुत्य

★ ★ ★ ★ ★

पोश तु पल

पनु पोंपरि ऑविलि पोशि तुल्यो
तम्बुल्योमुत कवु छुख माँजि गुल्यो
व्वलु म्यूठ करय रंगु दामानस
नोजुक पानस डेक जानानस
टेचि जॉविजि कुस शकलावान छुय
वछि वॉलिंजि कुस वुफुनावान छुय
मे ति वन साँ कॅम्य देवानु कोरुख
कस पथ वन फलवा गोमुत छुख
किनु वेरे चाने अबुसोवुख
सिर्य दानस बाला बॅल्य खोरुख
आज़ाद च्छु छुख वनु वारुक पोश
रंगु रॉछ छि प्रारान साज़ ब दोश

यथ जायि हना बेह माय बरय
अथ जॉविजि काये चश्मु जरय
मे ति हावख ना पनुनुय दुनियाह
अडु मोर गोमुत म्योनुय स्वपनाह
अख म्यूठ च्युहा मदु मोत स्यठाह
रथि खसवुन अख आशायि गुलाह
युस वोलमुत व्वलुहॅरिशव कृन्नव
युस ठोलमुत समयि गॅन्नव कृन्नव
व्वलु बोज़ गज़ल गॉलिब छु ग्यवान
रतु दॉव्य ज़गथ हति पॉव्य खसान
ज्यव मुन्नर तु पख कथु तारु करव
ननि वानु करव टाकारु करव
च्चु ति गाशस तन पुशरावान छुख
अनहॉर्य सदम अँजरावान छुख
मे छु अँगु क्वंडस दूद नाग वुज़ान

क्याह ताम छि अँदरी कतुरावान
आकाश छु दरती नालु रटान
व्वंदु लँहरन थनु याकूत प्यवान
स्वंदु ब्रारि छु गथ अखताबु करान
कावेरी स्वनु मूरँच्च अंदर
व्यथु वानिच रुमु सुसराय वुछान
च्च्यतु चंद्रन बागस काँली नाग
हँत्य हून्य छु रोटमुत वति पकवुन
फँट्य होवर्यव होवर्यव बोनि ह्यडर
खँत्य गाशिर्य रंगु सँर्य असमानस
बेयि द्राव कोलम्बस वथ छारान
बेयि कालीदासन ओबरस वोन
ह्योत सती सरन वाहराव करुन
वापस तँम्य ह्योत विजि वाव करुन
पनु पोंपरि सोरुय दुनिया चोन
व्वलु बोज़ कत्युक छुय बोज़ुन पय
पख नर्तकियन सुत्य ज्ञान करय
जज़बन हुँद्य थँद्य असमान गरय
शिलु तुलतम, तुलु त्यंगल छिम लॉर्य
व्यतरॉविम तनि ज़िलु ज़िलु काँत्याह
गुमु श्रान छि गॉमुत्य आरु पलन

★ ★ ★ ★ ★

तिम द्वह

तिम द्वह ऑस्य शायद खाबुय खाब
येलि नावन, डूंगन, सॉलन, मॉलन
दोरान लारान ऑस्य
दिथ तार सुली स्वनु सॉव्य डलस
व्यथु बॅठ्य पॅक्य पॅक्य कुनि यारुबलस
मनु एहसासुक्य समसार वुज़ान
रुज़िथ हिव्य मंज़र सॉर्य गछान
नज़रन ठरि कांह मा ओस अज़ाब
तिम द्वह ऑस्य शायद खाबुय खाब

क्वलु आरु वनां क्वसुतामथ कथ
मेठेमुन्न लय पोंपुर्य अतुगथ
कुनि जंगुल्य जोये त्रेशा चथ
नबु तारय ओस च़टान रबाब
तिम द्वह ऑस्य शायद खाबुय खाब

द्वह मीठ्य तु पानस तामुय ओस
स्वरमॅल्य संद्या स्वरनय बा होश
नखु नखु ओस शूबान पनुनुय ओश
दस नोज़ुक मस तेलान रातस
रूपु लाँकि बिहिथ वुज़मलु गाशस
वोथ जोदगरा डल आबस मंज़
संतूर वज़ान गिर्दाबस मंज़
तिम ऑस्य बदल, बदलय आदाब
तिम द्वह ऑस्य शायद खाबुय खाब

डल सौरुय चामुत श्रोकन्यन अज़
अँहरम तस च़ापप्रनि आमुत अज़
पनु पनु आदम कति रोज़्यस ताब
तिम द्वह ऑस्य शायद खाबुय खाब

★ ★ ★ ★ ★

पनु वँथुर

विजि वावन ख्वशवुन्य तूफानन
गटु कारुक्य मारिक्य अथु ह्यथ कुत्य
रंगु रादन पादन नाल वोलुन
दूद चॉविथ गव खूंखार स्यठाह
कुत्य तेहर्यन अदु वथुवार कौरुन
वँथ्य वँथुर तु खँत्य आकाशस कुत्य
कँह कतरिन कँचन बुथ नोहवुन
कँह द्राय तु छँकरनु आय तमाम
लँग्य लारुक्य दार तु दारुक्य लार
कनि मॉदानन सेकि सहरावन
अडु मॉर्य गछान, पोज़ रुद्य पकान
पनु वँथुर स्यठाह ऑविल्य नोजुक
शाहज़ादु तु शेहजारुक्य कौतिब
कनि कतर्यन लँग्य, ततु पँतर्यन लँग्य
कँचन गव हेह तँथ्य सुत्य गँलिय
कँह वुनि तँथ्य गिर्दाबस अंदर
कँह वावु गल्यन मोहताज सपुन्य
शाह ऑस्य तु वय ताराज सपुन्य
कँह आय म्वचान, कँह आय छ्वकान
कँह आय च्रमान, कँह रुद्य शमान
कँह दँज़मुच्र तन ह्यथ शहर शहर
नफसुक्य अमारन दारस खौर्य
कँह म्वकलॉविख अँछ गाशु निशे
थँद्य रॉयिल ठासान ठासान वँथ्य
कँह द्राय तु वापस आय नु कँह
कँह दँरियावन अंदर गँय रॉस्य
कँचन कोर केम्य ज़ॉच्रव आहार
कुत्यन वँर्य दाद्यव जिगरस ऑल्य

पोज़ पथ कुन यिम केंह बाकय रूद्य
तिम अज़ ति पकान कलु थोद थॉविथ
गलि ज़्यव पोज़ गॉमुन्न शेर दिलन
छी अज़ ति द्वहय सोचान रोज़ान
कति आय तु मँज़िल कुस सोनुय

पनु वँथरव रोस कुल नंगय अज़
हे, वँथुर वँथुर बेयि सौबरावव
पतु प्रारव सौतस बालस तल

★ ★ ★ ★ ★

नज़्म

नारु सँदरा बु छुस
बस अलावय अलाव
नारुची ऑडरन
आसि म्यॉनिस रूहस
नारु कंग ह्लू दज़ान
अज़लु प्यठु आस बुय
नारु तँत्य यिम मनस
तिम वुछम कुस सना ?

तेज़ मनकल वछस मंज़
तु अँदरी सुसर
तापु क्रायन अंदर
नारु दँज़ म्यॉन्य च़म
नारु अँद्य पँक्य दज़ान
त्यंबुर बदनस व्वथान
दँज़ फुलय येलि मे ह्योछ
ख्वखजि वँर्य वँर्य पकुन

फँट्य वतन तुरि कँड्य
आसमां गव सियाह
वुज़मलव ह्योत ग्रज़ुन
दुह्य लम्बख गँय खसान
शबनमस सूर गव
सूर्य गँय हे वनय कुत्य
अनहॉर्य वन

कृत्य मखमॅल्य शहर
कृत्य स्वंदर महल
कृत्य मंज़र अछिव्य
कृत्य मखमॅल्य जहां
समयि कायायि मंज़
खाक दामान सपुन्य
नारु बुज़्य गॅय वनय कृत्य
रुत्य बोस्तान

नफरतुक नार मा आव छेवरावनय
आदमस वॅथ्य तुफर
मॉसमन होल गव
कृत्य आशायि कुल्य
कृत्य बाज़र बॅरिथ
कृत्य गल गोश
कॉत्या सुबह मॉर्य मँद्य
नज़रि आतश सपुद्य

मारु वातल तु दिल तंग युथुय
कुन्य सपुन्य
खँन्न वुनल तिछ ज़ि
आलम यि सोरुय वोलुन
नार आल्यन द्युतुख
दुनियिहुच कांह ति क्वल
कांह ति व्यद हेच नु छेवरिथ यि नार
गव अमी नारु
तहज़ीबुकुय बुथ सियाह
ओस कॅह यी मोदुर
ज़हरु छ्वकनोव ती
यक कलम ज़ौल, दोद

खत, पॅत्र, लोलु हॅत्य ऑस्य केह
तिम नियख
छिम खॅनिथ थॉव्यमुत्य
दोजि एहसासुचे
नारु छठ गॅछ नु वातुन्य तिमन ताम ज़ांह

रुद च्यथ म्योन
शीतल हवा फाँफलान
युथ यि दम रोज़ि कॉयिम
दमस ताम येलिय
नेरि नोन आदमाह
त्रावि खत मीलि हुंद
नारु खावल चिह्यन
चापि शॅशतुर

तु सग त्रावि वॅस्तुर वनस
दॅद्यमुत्यन, चॅल्यमुत्यन
लायि आलव च़ोपोर
'ज़िंदु सपनिव' वन्यख
हे वॅरिथ नालुमॅत्य
नारु मोहल्यन वॅथिव
ह्यथ मशाँल्या अथन क्यथ
वॅरिव रक्स त्युथ
युथ यि ज़ालामुखी

म्योन दम फुट्य वजूद
चाँग्य गाशस अंदर
बुथ पनुन परज़प्रनिथ
खाबु मंज़ु व्वठ वॅडिथ
सपनि बेदार

पेँज पज़रुनथ प्रावि नॅन्य
युथ ज़ि शेहजार
मुश्कावि कुल आलमस

★ ★ ★ ★ ★

गज़ल

व्वथ च्चु होशिक्य पोश अज़ पूजायि लाग
रंगु सॅर्य रख रोशिमच्चि रादायि लाग

हायि गॉमृत्य कायनातुक्य जोदगर
मायि हुंघ चांदे वरक कायायि लाग

वुठ सुविथ ऑखुर बेहख कोत ताम वन
पानु जुवुनुक नार यथ च्यंतायि लाग

खाब वुछ पोज़ खाब गॅय खाबुय मगर
काकज़ी पोशन च्चु मोमुल मायि लाग

बालु पॅत्य प्रागाश नोन मा द्राव वुछ
शूच्य कॅह फुट्यमृत्य अछर आशायि लाग

सूर मंज़ु सॉरिथ अनुन स्वरगुक वजूद
वारु वति छॅकरोवमुत सरमायि लाग

अँदरु कनि हँद्रेर ह्यू लोगमुत दिलस
व्वंदु वुशनेरुक्य पलव कॅह बायि लाग

कायनातुच गथ ज़हुय छनु पथ पकान
स्वनहॅरी पर तापु दज़ि मच्चि छा़यि लाग

शाफ वथि पछ थव मनस अंदर च्चु पूर
सायि मजबूरो च्चु तापय क्रायि लाग

★ ★ ★ ★ ★

गज़ल

चु शूब म्यॉन्य छख बु इश्तिहार चोन
फुलय छे पोशि मॅन्न यि लोलु नार चोन

यराद् छी ज़बर खयाल छी अछिव्य
ज़ुहुन्य नु यथ करार सुय करार चोन

मॅछिज नज़र यि चॉन्य सहर सहर पडाव
कमन अंदर वनुम करय शुमार चोन

खज़ानु शोक हॅत्य मुन्नर तु जल हना
वॅथुर छुसय कुनुय मगर बहार चोन

कथन चु पानु सन लबख चु लाल कुत्य
वथा चु छख शिहिज बु एतिबार चोन

ठॅहर चु बालु कोल्य सेक्युल ति म्योन वुछ
अगर करख चु पछ बु सब्ज़ ज़ार चोन

हिसाब थाव व्वन्य मॅ कर छ्वकन शुमार
चु गाश बे बहा बु गाशदार चोन

वतन छि नेज़ु थॅद्य हतस छि कथ कुनी
चु पछ करख अगर बु म्वख्तु हार चोन

मे चानि लोलु कुय सहारु छुम स्यटाह
चु म्यॉन्य छख व्वमेद बु प्रानुवार चोन

★ ★ ★ ★ ★

गज़ल

छर्यर ह्यू अज़ छु बासान नव बहारस
नज़ान आलव छि बेकस यथ शहारस

छु च़ोलमुत च़ूरि कुस ताम दूर शायद
मँशिथ गोमुत छु मेछर नागु हारस

मुश्क न्यूमुत मुहिथ छुख अज़ ज़मानस
तवय शायद छु खुर यथ गाटुजारस

स्यठाह बदलोव नामन हुंद तरह मे
वुठन माँथुर सँनिथ गँयि ताजदारस
अमारुक्य वल, तु चँश्मन हुंघ समन बल
दिलुक्य अछिवल नियम कुस डॉल्य यारस

वरक फिर्य फिर्य अछर तँस्य निश छि लारान
खसान मजबूर तस मा केंह चिकारस

★ ★ ★ ★ ★

गज़ल

कालु नबस कुस तुलिहे तिख
वुज़मलि लीछिस स्वनहॅर्य रिख

छ्यतु सॅर्य म्वख्तु बुबर व्वतल्याय
हुकु तुज शोकु हच्चे अकि टिख

डोलि अंदर महारेन्य पेयि याद
यारुबलस प्यठ वेसि हुंज़ चिख

बहरामन द्युत मोतस नाद
पां चादरि गॅयि लोलच निख

दिवदारव कोर पॉज़न साल
कुठर्यन मून्य चिथुर खॉरिख
अज़ लॅज दिलु दुबरायन ज़ीर
मजबूरस निश दॅल्य वॅहरिख

★ ★ ★ ★ ★

गज़ल

वोत प्रारान चानि बापथ अख ज़माना हय मँची
ज़ानि कुस कस कूत लीखिथ आब दाना हय मँची

छुस पकान तलवारि दारे पान छुम पनुनुय गवाह
वात तम दादस हना, छख ना च़ दाना हय मँची

ज़िंदुगी ब्रँज्यन, ब्रमन अंदर पकान खामोश पॉठ्य
पोज़ अँदुर्य तेलान जज़बन हुंद तुफाना हय मँची

टाठुन्यारुक्य नगम छी चान्यन इशारन मंज़ वुज़ान
चानि हुस्नुक गोछ मे पोशुन आसमाना हय मँची

राज़ कौत्याह छिम खँटिथ सीनस अंदर मोलूम छुय
चानि बर तँल्य म्योन पकवुन कारवाना हय मँची

छख यिवान येलि पूर्य किन्य अखताबु छुस डेशान बो
म्यानि बापथ ज़िंदु रोज़ुन जेल खाना हय मँची

छुस मनस चॉनिस अंदर अख नोव ज़न्म शायद लबान
दूर छुस मजबूर प्योमुत राज़दाना हय मँची

★ ★ ★ ★ ★

गज़ल

चानि बापथ सूर्यमुत्य त्रिह छुस सरान
रुठचमुत्य रंबुवन्य वचन फिर्य फिर्य परान

ओल युस येर्योव यागर पॅछनि न्युव
नारु सहरावस अंदर दूह छुस बरान

सलतनत चॉनी छि बॅड अंद छुस न तार
म्यानि म्वख्रु कवु कौद खानय छख गरान

सोंथ छी स्वरमॅल्य अॅछन अंदर खॅटिथ
सानि वेरे हर्दुकुय पन छख हरान

लाग वर्दन, मल अॅतुर मुश्काव तन
शर्मि हुंद पॉथुर कवो अज़ छुख करान

डाल दिख यथ दॅदवनस फ्वलि म्वख्तु डल
साफ कथ वनु हा तु तथ मा छुस दरान

साज़ तुल, गुमनाव वुठ लय आछु नाव
अज़ बु छुस संगीतु सॅद्रव मँज़्य तरान

★ ★ ★ ★ ★

दुख

स्यटाह कोर ज़ोर अखताबन मगर थोक
सियाह ओबरन नबस वाहरोव दामन
जेर्यव वोथ रूद दरती सीनु दोरुस
फम्बुक्य अंबार खँत्यमुत्य बालु मालन

कयामथ वँछ मगर ठँहरेयि नागाह
बँठिस ओस जोशि फोलमुत पोशि बागाह
हवा मुशक्यल वुछुन बस ज़ोर म्वकल्योस
ब्रगाह छोट बोनि वँथरस प्यठ बिहिथ ओस

व्वजुल लालाह छु ज़ोतान ज़ून गाशस
छे लॉला ऑल हिश प्रारान रातस
कनन हू हू गछान क्याह ताम गांगल
दलीला छुस वनान पॉज़ा कनस तल

शिकारे नम छु गिर्दाबस अंदर खम
व्वखुर लोगमुत चँकिस दँरियाव बरहम
मचर मँस्ती तु मेछर जिंदुगी हुंद
छु पारुद थामु गोमुत जोतले जम

महासीरा सरस मंज़ दिल छु लूबान
तुलिथ छाला छि हावान योसमुन्य पान
बँठिस प्यठ जानुवारा माय लॉगिथ
ख्यवान अफसूस पोज़ केँह छुस नु फोरान

शिशुर कठ कोश तु फवलुवन्य तुर रातस
यिथिस मंज़ नारु जोशा थावि युस मस
सुसर लागि मानि अँदरी पॉन्य पानय
मँतिस मागस ति हारुक्य ब्रॉत्य गछनस

हेरा दाँतुव छे पोरस जोरि मारान
पद्यन हुँद्य आख कस तामथ छि छारान
मन्नर वोथ दारि प्यठ येलि ख्वश हवावस
तेली वॅर ग्राव बबरे अर्गवानस

छु कॉलीना तु रंग छुस ज़ाफरॉनी
रिक्ॉब्या गछ वॅग्डिथ अँथ्य प्यठ छि खॉली
शमा दूरी दज़ान चूरी छु गहलिस
तु सोदागर मंगान क्याह ताम शिहलिस

छु सँन्य चूरा खँटिथ अथि काँसि मा आव
फरान छुय सारिनय मशकूक छुस नाव
ब्रंज़िस सातस खँसिथ तख्तस करान राज
अत्यन शाहो गदा सॉरी छि मोहताज

किताबा शूबुवन्य नोन छुस नु तँहरीर
इशारन मंज़ लेखिथ छिन थॉव्यमुत्य सीर
वरक फिर्य फिर्य छु योदवय केंह नु मेलान
गछान देवानु काँत्याह, यूत छु तॉसीर

गँमुत्य हॉरिथ छि अति काँत्याह कलंदर
रेष्यन सादन तु दरवेशन फुटान पर
सँरिथ सूचिथ कलामस वॅर्यजि वखनय
योहय छा जिंदगी हुंद सोर हर तर ?

सियाह पोशाह मगर वुछ लूबवुन क्याह
हकारत क्याज़ि वॅरथस छुस खता क्या
रंगन वॉलिस छि रंगन हुंज़ महारथ
पलस अंदर छु व्वपदावान दुर हा

द्वहस यथ कायि कुनि मा स्वख छु सातस
छु सोपनन हुंद ज़गथ वोलान रातस
च्यतस मंज़ हंगतु मंगुच चॅक्रु मांडय
स्यठाह मुश्किल छु वातुन अथ हिसाबस
करख परखाय चीज़न आसि योद ज़ान
स्यठाह मुश्किल छु परखावुन यि इनसान
'करान पोशे चमन वॉसन यबादथ
अदय कांह नज़रि वोला पॉदु सपदान'

रिकाबस मंज़ छु ख्वर रखशस दिन्नख ज़ीर
दपख ठॅहरुन! छु मा तथ कांह ति तदबीर
सवारस ज़ीर लॅज रुम राठ सोर्यस
प्रछा तिछ यथ नु ज़ॉहिर कांह ति तॉबीर

म कर जल्दी च़, बॅल्य रावी पनुन वक
ज़मानस छुय बुकुर गोमुत स्यठाह सख
सौबर फॅल्य प्वख्तु पनुनिस होशि हारस
वॅसिथ युप छा लगान पतु तॉर तारस

मे बेयि सुय बोनि बागन हुंद हवा गोछ
गरन अंदर शुर्यन हुंदा रुत सदा गोछ
अमा वॅम्य स्वर्गु दारस शाफ द्युतमुत
हॅकीमा नौव तु छ्वख बलनुक दवा गोछ

छे जाया तंग त्रॅसिथ आमुत छु दुनिया
अजब शोरा तु कथ बोज़ान छुनु कांह
यिथिस अंदर छ्वपय करुहाव ताबा
छु वक वॉतिथ फवलान पानय ग्वलाबा

स्यठाह मुश्किल अचुन अँदुर्य छु अंदर
मंगुन पज़ि ती यि सार्यन रोज़ि बेहतर
लये सुती यिवान आदम लये छुय
हँसीना लागि युस शूबान ज़ेवर

खबर बूज़म ज़ि अख द्वह वॉसि गव कम
छु द्वहदिश पोशिनावुन साज़े महकम
अथन मंज़ रास पोज़ लमनस खबर कुस
पकान नावा तु नोन छुनु हाँज़ या हम

छे यावन थँर तु बावँच बल छु मुश्कान
मंगस पोशाह, दिया केंह छुम नु बासान
छु बेहतर दूरि दूरी नूर छावुन
छनन मा पोश येलि व्विथि वाव तूफान

अँछन गाशा क्वठचन होशा गॅनीमथ
पकुन मॉलस मगर नँन्य छय नु कांह वथ
छु जश्ना यथ अंदर सॉरी छि बदमस
कृहुन्य बोज़ान छुनु येति काँसि हुज़ कथ

छु ओर दोर आदमा बॅल्य हायि गोमुत
दपान करु क्या बु वक्तस ? ज़ायि गोमुत
वॅरिथ ह्यकृ कार रुत्य पोज़ वार मा छुम
मकाना नोव छु अँदुर्य आवुस्योमुत

छि लवु हँत्य दूर्य औद पोक बारसस आव
पँतिम पँहरुक छु वक अँछ वारु मुन्नराव
सुली छंदरिथ ज़ुन्न हुँद ताज लॉगिथ
नबस गब कँह चँटिथ अखताबु नोन द्राव

व्यन्नारन हुँद्य व्वलर येलि दूँछुरॉविम
यरादन हुँद्य महल खॉरिम तु वॉलिम
अमारन हुँजु हमान छनु त्रेश हरगिज़
महाभारत मे अँदरी कुत्य हॉरिम

गँछुम जाया वनस अंदर स्यठाह दूर
मतेमुत्य शहरुकिस शहरस छि सँन्य चूर
सिराह कुस ताम थॉविथ डंजि वथ कथ
कथन मंज़ शोरु बँर्य बँर्य ज़्यव गँमुन्न लूर

अथस वुछतम रुखन क्याह छुम मे तकसीर
बु गोमुत हंगतु मंगय क्याज़ि छुस गीर
बु योदवय गाश सँदियन हुँद रछान आस
अमा व्योख्तुय बनोवुख म्योन तसवीर

★ ★ ★ ★ ★

नगमु - १

स्वर्गय लूकच सब्जय डॉली
पतु वथ च्यु छख बख्तावार
लछु बॅद्य अथु छी हय स्वंजॉली
पतु वथ च्यु छख बख्तावार

हनि हनि रीशिम तनि छुय नॉली
जायि जायि लॉगिथ छख दरबार
रूपु वॉनिस मंज मस बंगॉली
पतु वथ च्यु छख बख्तावार

हतु बॅद्य कूलर त्रॉविथ नॉली
गथ क्याह मारान पॉट्य अंबार
ताल छय आकॉश, मूल पातॉली
पतु वथ च्यु छख बख्तावार

वति वति सनिरन, थजरन, नारन
सनु वुन्य छखय बोजुनावान तार
दूर छख अलुरान पूर शाहमॉली
पतु वथ च्यु छख बख्तावार

केसॅर्य जामु चॉन्य नारु मशॉली
तिहरिस बोलान जानावार
चोनुय र्नेह असि पूशिन मॉली
पतु वथ च्यु छख बख्तावार

जामन खारान चॉन्य अंजॉली
पंजरन मंज चॉनी आसार
मजबूर नारु मंजु रछतन ऑली
पतु वथ च्यु छख बख्तावार

★ ★ ★ ★ ★

नगमु - २

बुथि प्यठु थोद तुल नोजुक नॅरिये
व्वलु रूदु जॅरिये कर ठॅहराव
वॅक्य गॅरिमृत्य छी यिम र्वनि हॅरिये
व्वलु रूदु जॅरिये कर ठॅहराव

तनि छी लॉगिथ अबरक वॅरिये
सीमाब सॅरिये अस्तय पख
वुज़मलु वनवान रोव वॅक्य वॅरिये
व्वलु रूदु जॅरिये कर ठॅहराव

नपु नपु करवुन्य हय नन्नन गॅरिये
चंदन सॅरिये आयख मा
हरम्बखु चॅजिखय होकर सॅरिये
व्वलु रूदु जॅरिये कर ठॅहराव

कॉलास बालन वोलास वॅलिये
पेठ्य महाबॅलिये लॉयिथ छाल
अमृतु थॉविथ सर बॅर्य बॅरिये
व्वलु रूदु जॅरिये कर ठॅहराव

रोशि रोशि आयख कमि सॅदप्रिये
वरनस सतुय हम सॅरिये छय
पानस चॉनिस ऑविल्य बॅरिये
व्वलु रूदु जॅरिये कर ठॅहराव

आकॉश आयखय म्वख्तय लॅरिये
पुरखाश खानु बदोश तुल
स्वरगुच शेछ वन बागु बबॅरिये
व्वलु रूदु जॅरिये कर ठॅहराव

आशि सुतुय छलनय पॅद्य कौशिर्यये
ग्रॅश्मय वॅरिये वातख ना
मजबूर प्रारान छुय लोलॅरिये
व्वलु रूदु जॅरिये कर ठॅहराव

★ ★ ★ ★ ★

नगमु - ३

तन छय न्यथुनेन्य दस कलु वॉली
स्वंदर मॉली यिख ना यूर्य
शेहजार चॉनिस बदनस नॉली
स्वंदर मॉली यिख ना यूर्य
हये वावु मॉली यिख ना युर्य

वेर नागु ज़ायख पेठ्य पांच्रॉली
फेरान कवु बॉल्य बॉली छख
असि कुन अज़ यिख ना यॅच कॉली
स्वंदर मॉली यिख ना यूर्य
हये वावु मॉली यिख ना युर्य

दर्दय बॉथा तुल पोशि हॉरी
थेपि थेपि छारान सॉरी छी
सॉनिस स्वनुसुय गॅयि सरतॉली
स्वंदर मॉली यिख ना यूर्य
हये वावु मॉली यिख ना युर्य

स्नेह छुम चोनुय वेह छुस च़ालान
पालान रोज़य चॉनी द्वह
'मजबूरा' छुस ला वुबॉली
स्वंदर मॉली यिख ना यूर्य
हये वावु मॉली यिख ना युर्य

★ ★ ★ ★ ★

नगमु - ४

रूप की जालार शीशय लॅरिये
पां च्चादॅरिये शूबान छख
जॅरिये मस छुय गुलदफ पॅरिये
पां च्चादॅरिये शूबान छख

तन छय ऑविज ज़न ऑनु पॅटिये
दामानु थाव वॅट्य वॅटिये व्रु
खामोश वुठ चॉन्य साज़दॅरिये
पां च्चादॅरिये शूबान छख

नालन मंज़ चोन मातामालय
ज़ालय वॅम्य सन लॉजिख वन
सुत्य सुत्य कौत्याह छिय सालॅरिये
पां च्चादॅरिये शूबान छख

पूज़ा शूबी श्रूत्रिस पानस
चे तु जानानस फर्क्य क्याह
'मजबूर' थावी प्यालु बॅर्य बॅरिये
पां च्चादॅरिये शूबान छख

★ ★ ★ ★ ★

नगम् - ५

म्वख्तु म्वलवान मानसबॅलिये
शाह कोलिये लोल हय आव
सुलि द्रायख यार्यव तॅलिये
शाह कोलिये लोल हय आव

चानि सगु सूत्य कोह तु वन फोलिये
कृत्य बेमार बॅलिथुय द्राय
जायि जायि खॅत्य कुल्य अॅल्य अॅलिये
शाह कोलिये लोल हय आव

नागु प्वखुर्यन चोनुय र्नेह छुय
गासु तुलिनुय चोनुय नेह
बोनि छायव वरदन वॅलिये
शाह कोलिये लोल हय आव

दूरि औद पोख आव व्वलसनसुय
तीर्य खेल्य खॅत्य वॅस्तुर वनसुय
राज़ु होंज़ तॅर्य सॅनिजे डलिये
शाह कोलिये लोल हय आव

सिरयि द्रामुत र्वय चोन वुछने
चोन मर्तब पानय रछने
हॅल्य हॅल्य छी गॅड्यमुत्य हॅल्यये
शाह कोलिये लोल हय आव

पानु मजबूर चानि शीनु वाने
लोलु मान्ये मुच्चरावान
दानि दाने र्वफ हेयि मॅलिये
शाह कोलिये लोल हय आव

★ ★ ★ ★ ★

नगमु - ६

यँदराज़ुन्य र्वनि माहरेनिये
सावेनिये यावन छाव
नेर राशस फेर गतु रेनिये
सावेनिये यावन छाव

सीटु-दँरियोय पश ज़रकोर्य
आगये छी कुत्य बापोर्य
पर्दु थोद तुल मुन्नराव तँनिये
सावेनिये यावन छाव

नावि नमुकी तीर छख लायान
खूर्य आलवान संतूर वायान
चमु खमु पख हय रम्बु रेनिये
सावेनिये यावन छाव

नेर सॉलस फेर तेल बँलिये
वीरि छायव तुलिये नीर
अथु मुस्टी चंदु छी छँनिये
सावेनिये यावन छाव

सालु मतिनुय छख तम्बुलावान
होशि डालान नावि छख वालान
वावु गलिनुय छख कुन्य जँनिये
सावेनिये यावन छाव

पानु पेठ्य पख समसॉर्य सॅद्रस
यिनु अँदरी दामानय
गाह वॅन्त्य छख गाहे थॅनिये
सावेनिये यावन छाव

रादु रादय पॅक्यज्यम वुछिथुय
वादु ओसुस गोस मा मॅशिथुय
पानु मजबूर दियिहस वॅन्त्ये
सावेनिये यावन छाव

★ ★ ★ ★ ★

=====

Source: 'tyól' by Arjan Dev Majboor. Year of publication: 1995
Rewritten in Devanagari-Kashmiri by **M.K.Raina**
Work completed on 21.02.2005 ~ Updated 21.03.2020
